

天2.623


34

24



翰林院侍讀子靜杜君墓誌銘

嗚呼吾友子靜竟歿矣去歲之冬尚寓書于
年決計北來私喜握手有日斯時固無恙也
遽歿耶嗟乎子靜君天下士也憶君少時為
文譽藉甚郡守范公葺書院拔諸邑之尤者讀書其



中君與相國魏公司空傅公及余兄弟^皆在選一日見
君被服都雅神氣奕奕與諸生拱揖衆咸屬目余於
是始識君相與定交及今四十餘年如一日君長余

三歲與余兄雪岩同鄉舉每兄事之今已矣其兩弟
鏌錦手所為狀來請銘余安忍遜辭乎君諱鎮子靜
其字先世由山西洪洞遷畿內居南宮之孝昌村世
安耕鑿至于盤公國漸始以經術顯起家元城訓導
陞陝西澄城知縣著有聲績生德珩公珥以君貴贈
朝議大夫君為德珩公長子生而穎異眉目開煇聲
欵如洪鐘澄城公竒之撫其頂曰是兒必振吾家童
時日誦數百言皆上口驚其儕輩澄城公携之任誦

讀之暇輒告以蒞官臨民之要君識之不忘澄城公
既歸日課諸孫擇師取友以道義文章相鏃礪篝燈
熒熒寒暑罔間於是君業大進以儒士入闈不利益
發憤為文已卯遂登賢書出秋岳曹公之門年終逾
弱冠人艷稱之教上公車不售乃多讀古人書留意
世務為有用之學交遊漸廣兼搜博綜不徒為章句
之儒矣甲申之變寇盜蜂屯鄰邑淪陷人心洶洶君
投袂而起首倡大義集闔縣士民盟於神慷慨激發

衆咸聽命倉卒修戰具固城守賊薄城下賴有備不能克又時出不意簡精卒大創之賊咋舌遁去當烏驚獸駭之時孤城屹然獨完乃益服其持危定變具有方畧非區區一書生僥倖嘗試者也君為名孝廉久一時賢豪長者聞風嚮慕皆願瞻就君與之翰情悃投縞苧至戊戌始成進士當為令得山左之陽信是邑最疲而瘠賦役繁重積逋至一萬四千餘金前令羈留不能去者尚數人君至極意清釐在民者亟

請豁除在官者破產代補十七年之夙欠結於一旦前羈留者乃得歸發奸擿伏咸咤以為神爬搔利病如營其家不數月邑以大治省民間十餘萬金而君之產因以減矣山左故多盜又苦僕區之法自是盜賊不敢入境閭閻無匿逃株連之患他人所束手者君處之裕如咄嗟立辦上官競相引重他令莫及也未滿俸尋擢中書科中書舍人邑父老遮道挽留不可得乃建祠祀之癸卯主四川鄉試榜發蜀人服其

公慎是歲各省闈磨勘多呈吏議獨蜀牘無間言君
聞望日隆考滿列之高等高陽相國於門人中最愛
君號入室弟子薦紳先生聞君至爭為倒屣故事中
書官應考選省臺坐陟清要乃至是忽更為部郎改
授丁未止平進刑部湖廣司主事纂修大清律較勘
精詳堂官倚之如左右手無何開館博徵鴻儒修

世祖章皇帝實錄君以夙望與焉書成授翰林院編修
時以為榮然君侗儻負幹材多智畧每思膺事任以

稍試其經濟而從容翔步迴旋磬折為文學侍從之
臣非其素志也君艱於舉子生一子端慧髻鬢如成
人已而病殤君以是意念灰冷無復功名之想癸丑
請假歸丙辰起補中允旋陞侍講晉侍讀鬱不自
得無何復移疾去愴然曰知止不殆漢二疏何人哉
於是修家廟蒔花木徜徉其間將終老焉君生平儉
於自奉豐以待人後房無紈綺珠璣之飾而治具邀
賓流連談讌性又善飲能竟夕不亂徵歌顧曲襍以

滑稽酒闌燈地興致益豪以故賓筵客座非君不驩
而余卽舍與君望衡接宇晨夕過從抵掌笑言徃徃
漏卮不休論及當世之務袞々如珠之貫而泉之湧
也嗟乎以君之才左宜右有可以斷決大計弘濟艱
難而不能為 國家當一面雖致身青雲不究其用
此可為太息者也君既不得志而歸乃孜孜為德於
鄉乙卯歲蓮妖煽亂陷新河迫脅居民棄城以闢官
軍攻克之掠婦女以千計實皆良民也君賣宅得五

百金持詣軍前多贖歸閉之公所聽其家人認領完
聚皆羅拜以去察勘隱地令下當事者謀按畝虛增
而以墾荒邀功君曰此百世之累也因力陳其害乃
止其為民請命無所鯁避類若此至於事親盡孝為
於友于財產忠讓同氣交友重然諾尚信義人或有
急傾身赴之如恐不及值歲屢凶糞倉賑飢又多方
勸富室捐賑散米千餘石每冬施粥先後五年計亦
千餘石所活甚衆蓋排難解紛輕財好施天性然也

平居健飯無疾病除夕前饋問親知如平時正月初
五日始覺煩懣明日端坐而逝吁亦異矣君晚好導
引之術其去來炯々有如蛻化殆深有得於中者乎
君以萬曆丁巳三月十五日生康熙甲子正月初六
日卒年六十有八元配韓氏太學生韓公女長齋奉
佛有逮下之德累封恭人繼配楊氏丙戌進士揚公
孫女子一沁早夭女一適庠生張鵬翼孫一棊邑庠
生聘乙丑進士御史賈公會孫女以某月某日葬於

某阡嗚呼君與余交如手足吉凶同患氣分尤深君
既歿余復何賴哉雖然君年未登耄耋而其可傳於
後世者自在以視世之貴盛壽考而無德可稱述與
草木同腐朽者當何如也必有能辨之者矣隕涕而
為之銘曰

懿哉我友內行淳美世之畸人家之孝子早蜚英聲
晚登臚仕金閨翱翔簾閣緜几友朋飲醇公卿倒屣
所志不遂彛猶閭里謀人必忠守官知止蹈義履仁

克終克始哲人云亡床琴遽委勒此銘詞以俟信史

題沈宮詹書冊

沈克齋宮詹為其同族女弟韓孺人書女箴一冊余
觀之嘆服且肅然起敬焉宮詹書法既工而又錄古
之淑女貞媛以示訓其意何篤也孺人生于貴閥歸
于名門與余有孔李通家之好聞其知書嫺禮處困
若素宮詹視同毛裏周其緩急不遺餘力展讀斯冊
亦足徵友愛之一端矣余高宮詹之義為書其後至
其墨妙海內共見余不具論嗟乎宮詹往矣每念之

輒深山陽之感幸此冊長存子敬之琴猶為未也
夫

跋董宗伯樂志論圖

雲間尚書詞翰圖畫沾溉海內而贗本流傳真蹟頗
少此卷寫樂志論濃淡合宜烟雲變滅深得董巨遺
意洵文敏不易之作也其跋云嘉禾有王蒙樂志圖
余向曾見于友人所分段細繪極幽栖之致嘆其工
絕今觀此圖尤為高脫尺幅之間尋味不盡條然自
遠書摹楊凝式而變化出之晴窓展玩覺清風徐來
塵情為之一滌矣

後園集書後

余兄性好讀書於古今載籍無所不窺少即留意聲韻之學出入三唐發為歌詠氣格雄渾有大家之風通籍而後乃好宋人之詩退食長吟往往規摹陸放翁諸公之作嘗云自入世網年當遲暮不能組織彫績為工吾聊以自適而已其言如此然非不能也晚歲淡于仕進里居日多時乘牛車棲于村墅翛然自得
得有出塵之想風和日麗每泛小艇携筇杖流連溪

壑間或招黃冠與語丹砂輒有所作率皆簡澹古質
達意而止顧按其旨趣實有合乎先民之矩成一家
言較之今人浮夸剽竊者抑亦遠矣生平所著頗富
自加刪定僅存四卷兄子允桓梓之泗水署中甫成
而兄謝世余嘆子敬琴亡而其寄託高深茲編具在
庶幾見之迴環三復未嘗不泫然而掩卷也

題山谷楚志詩卷

山谷書佳者余嘗見數卷茲又從儼齋司農得觀此
卷老氣橫九州真可瑤也儼齋近又獲諸上座書與
此殆稱雙璧神物之合若延津龍劍快何如之

題王子靜小照

貴胄文儒金聲玉色味道讀書圖史在側秉訓父兄
溫恭冲抑被服端居其儀不忒國子先生士林矜式
頰上三毛傳神尺幅種槐門風烏衣世德猗歟象賢

孝思維則

題山谷書諸上座卷

涪翁此卷摹懷素書昔曾觀於退谷翁齋中見其紙墨完好神氣奕奕有紹興小壘秋壑印記知屬宋大內所藏尤為可寶退谷蓄古法書甚富此卷實為甲觀今從儼齋司農所又獲展覽流連不能已司農攷攷好古每獲寶墨愛護如天球琬琰予更幸此卷得所歸矣

跋陳說巖書秋聲賦

海內學書者多摹襄陽然不過得其怒張之態耳如說巖搃憲此書氣骨蒼秀體勢翔舞可謂得其神非徒形似者覺海岳風流去今不遠

題王慕齋相國小照

熊熊其氣奕奕其神目光瞭焉擬巖下之電而羊骨清徹則秋水之絕塵早歲登朝翺翔詞苑既登三事翊贊楓宸洞晰機務淵乎其若谷冲懷折節盎然

其如春假虎頭以寫照倚片石之嶙峋芝蘭玉樹拱
立逡巡意其過庭訓迪具有顏氏之家法而垂紳正
色信為寥寥之畫臣

臨樂毅論跋

吾師博極群書貫穿百家舊稱為詞林弁冕晚歲研
精內典兼工八法所臨樂毅論深得右軍之意不徒
取其形似也山顏木華遺墨邈然今獲觀此卷手澤
如新風流未墜西州之慟復令涕泗無從已

閔子像贊

孝哉夫子克化毋慈勇辭季氏守道不移影纓播笏
遺像如斯內行純備千秋人師

吳繩宗廣文像贊

剝裳肅然貌莊而厚排難解紛言動不苟八十考終
台背黃耆仕擁皋比鄉推祭酒

題張正甫倣倪迂畫

元鎮在明初徵之不起世稱為隱君子其所點染古
木竹石脩然自遠畫家目為逸品正甫人品甚高孤
立絕俗偶摹雲林遂可亂真維其有之是以似之予
於正甫亦云

齊河縣佐王弁伊先生墓誌銘

寧陵王弁伊先生以戊午歲卒於家予為之惋嘆累
日先生以宿學通儒有聲梁宋間來遊京師戊子冬
予見之于外舅通政王公所神采奕奕抵掌談古今
事亶亶不倦若泉之涌而珠之貫也輒心異之旋延
於家訓子弟輩予史館多暇每與之談咲窮日夜益
服其博洽先生蓋不羈士也適與通政公同娶於都
門邵氏為姻婭故游處甚洽為忘年之交距今三十

年矣憶癸丑歲予有嶺南之役往返道出寧陵晤先生康強無恙猶能作竟夕談歸而聞其遘疾展轉床褥者四歲以訃聞葬且有日子謹褒以狀來請銘曰先子嘗謂四海寥廓惟中山司農識我得一人知己可以無恨隧道之文非公無以慰先子於地下予感其言曷忍辭按狀先生諱璫字弁伊別號壽林先世廣平人後高祖守約徙家渡河始占籍寧陵曾祖諱擢世業農有隱德以子貴贈刑科都給事中祖諱胤

由進士官刑科都給事中以爭建儲削籍後追贈太僕寺少卿稱直臣父無逸以明經為白水知縣遷杭州府同知死寇變先生幼警敏於書無所不窺才鋒迅發掉鞅詞壇為高材生數不得志於有司晚乃以明經除偃師縣訓導八年官奉裁補任封丘甫一年陞廣東吳川縣丞未幾官又裁補山東之齊河數歲之間四經遷轉奔走數千里先生游已倦輒引年棄官歸蓋先生性疎落不耐吏事勉就銓除折腰公府

非其志也當少壯時意氣蓬湧塵視軒冕雖家世華
貴而孤亢耻偕流俗不問家人生產以是家漸落傲
然不屑意中歲避亂江左愛其風土有終焉之志與
吳越間名流韻士論文角菴把臂定交慕昔人縞苧
之風于是聲氣浸廣游踪殆遍既而挾策北來棲遲
長安即舍者數年葢日益增家日益困伏首為小吏
不得意始決計閉戶柳溪無復四方之志矣聞郡丞
公作令時以家政委之仲子先生獨以花鳥琴書自

娛一切不與聞郡丞歿客有設辭離間者先生謝曰
君誤矣先人愛我弗強以所不能吾弟何咎焉仲氏
聞之持累歲出入之籍以自白先生終不視立命焚
于父柩前歆然如初又姊病薦托以幼女先生撫如
已出割腹田為嫁資里有楊生者負異才而貧先生
出所藏書數百卷資其誦讀復贈田十餘頃佐燈火
後轉售他姓亦不復問也嘗游山陽遇故人于逆旅
偶言及族人曾鬻宅一區於郡丞公直千金先生輒

納贖券一紙不索價而去此教事者今人所難先生
豈非古之賢豪長者乎跡其生平樂易爽剴不侵為
然諾尤能強記舉凡耳目所覩聞人物姓氏爵里隨
意叩之皆應如響歷久不忘當賓客襟坐酒酣耳熱
諧譔橫生無不傾聽解頤恨相見之晚暮年喜讀先
儒語錄及佛書道錄悠然有得所為詩凡數變初摹
唐子畏既又摹鍾譚兩家後乃盡焚所著究心唐諸
大家有柳溪草堂集若干卷其司訓兩邑也結緹山

社建封父亭教授諸生欲以興起雅化徃徃未久輒
去官不遂其願可哀也已疾亟時手自刪定諸詩預
知死期洒然蛻化非知道者能之乎先生生于萬曆
丙午十一月初六日卒于康熙戊午十月二十八日
享年七十有三元配楊氏高丘侍御公諱楫孫女嫺
於內則長齋繡佛感異夢先卒繼娶王氏庠生王光
嗣女子三長當世邑庠生娶范氏侍御諱良彥孫女
楊氏出次定世邑庠生娶劉氏庠生諱光祚女周氏

出出後於從祖文學公次黨褒士子科武舉娶侯氏
太學生諱方盛女邵氏出女三長適黃鐸次適馬樗
俱王氏出次許聘武生張澐邵氏出孫十忠嗣忠傳
巢鳳圖麟當世出子鉞子衮子彤子軒子冕定世出
忠朕謹褒出孫女十曾孫男五曾孫女九詳在行述
中先生之後浸昌矣卜于某年某月某日葬于某阡
余不負先生之遺命遂系之銘曰

先生為儒號腹笥多識博聞能強記忼慨激昂鮮求
忭伸眉抵掌群辟易遲暮捧檄詎其志歸老柳溪環
薜荔鄉之祭酒庶無媿高丘端然增涕洟

少司馬漢清李公傳

公諱崇馥字子榮別號漢清山西高平人其先世居沁源始祖桂徙高平家焉祖向春以選貢為西鄉令治行推闕西第一父濬慶贈兵部侍郎公生而敏悟過目輒記好學善屬文年十四補學官弟子員每試輒第一己卯舉于鄉丙戌成進士授刑部河南司主事尋遷四川司員外郎又遷本司郎中多所平反其治獄本之仁恕而依於法律大司寇黨公深倚重之

戊子秋分校京闈得士多名宿出為湖南督學叅議
杜請託抑奔競所獎拔皆寒士倡興古學三楚間號
稱得人丁母艱歸舟抵舊口遭異風覆溺順流而下
十五里獲救免人以為孝感云服闋補湖廣荆西道
叅議時西山餘賊負固逼近郢上又連歲水旱民不
聊生公外供芻糗內咨疾苦戢兵清獄築隄葺堞所
設施具有方畧甲午歲禁旅過其地欲謀居民間飼
馬公持不可徃復力爭卒處之郊外市肆安堵臺使

者大加褒獎尋遷陝西驛鹽道副使會三川未定大
兵進取屯漢中羽檄四馳驛遞繁不能支又協站額
餉州縣催呼不應公上疏力陳其弊請銜邑如應協
之數即留支而以他邑協者解司庫一轉移間可蘇
驛困上嘉納之遷本省督糧道左叅政陞四川按
察司按察使以緩刑息訟有聲內陞兵部右侍郎公
既自外臺召入為九卿益矢恪恭勤修職業為上
所知無何謝病去丁未起補倉場戶部右侍郎尋仍

改兵部右侍郎遂引年致政歸公為人端謹淳篤以
名節自持其才練達造于世用而干以非義雖毫髮
不可私故不能愉愉响响取悅當世而公之視榮進
利祿泊如也性慈惠好施急人之急邑嘗飢公發粟
賑之戚友或貧不能婚葬者公捐貲為經理不少恠
於孤寡撫恤尤厚嘗自言吾居積不饒而好施樂善
豈以博名性固然耳里居十餘年而卒
贊曰公自蜀召入為司馬時余方典中樞親見公之

勞心國家裁決庶務遠謨深計有過人者而冲懷雅
量無矜伐之色余與同官最久稱莫逆嘗歎息以為
不可及庶幾古大臣之風惜其難進易退而遂未有
以竟其用也歸田後讀書茶谷中嘯歌自樂若等貴
賤齊得喪者之所為出處之際蓋兩得之矣公既歿
之三年其子耀震持狀請余為之傳以行遠余感公
夙誼因叙次其畧為公傳俾國史有徵焉

椒山祠聯

指倭叫天閣顛隕何辭身雖死而奏草霜寒金匱編
摩傳信史

周行瞻廟貌英靈如在世既遙而鬚眉風動土人伏
臘哭忠臣

忠烈祠聯

百煉天丹心馨薦群賢慘澹忠魂千象緯
孤城殷碧血芳流千載昭回士氣壯河山

高司寇日涉園堂聯

平泉寓元老經綸鳥語松風半入西園絲竹
雅社集耆英冠履花香月色全收北海樽罍

劉永生對聯

佐郡稱平想獨鶴隨裝執法疑山光世德
分司砥節看千艘啣尾持籌如水見臣心

贈

提甕相賢夫儀著閨幃傳槩範

含飴撫弱息息全鞠育啟門楣

曹年兄幃聯

憶當年雁序參差壯志未衰戰勝禮闈光桂籍
嘆良友琴聲寂寞仁人有後天留遺腹接書香

贈某孺人幃聯

幼作配於鴻儒相警雞鳴相慶鹿鳴不媿烏衣世德
長宜家於舊闕克昌婦道克光母道聿昭彤管徽音

贈某孺人幃聯

壽躋耄耄之期內訓雖和爭頌德門令母
恪式刑于之化躬勤操作無慚哲士家風

贈曲周路封翁

貽太史以令謨圖書滿壁詩禮趨庭共慶里門朱草
秀

紹中丞之駿烈孝友克敦琴樽自適俄驚天上玉樓
成



